

2 PETERO

Pepa Petero ingere muli panzi kalo-tawana tamâta

Yesu ne pâri-tamâta Petero ingere ngua panzi Juda tamâta njinde kalonzi tawana Yesu ku simo pwawataki (1 Petero), aku zo pinde ilâ lâ, njineŋga ingere ngua pinde panzi kilo. Petero ne zo nana imâte kê nde imâ ipânŋa laiti lâ (1:14), aku isama tu kinzi pananâŋa tamâta laŋeŋa pinde nde simo kinzi ngu nginzi, ku situla ilo-kalo soki-soki siyaula tamâta nenzi kalo-tawana. Kinzi pinde siporo tu Yesu ma itaulo imâ kilo tia, andeta Petero itula ngua mao tu Yesu ne zo nde ikeno mo ŋai yo (3:3-13). Ara nana kinda rârâni ma tapu mulinda pa ngua laŋeŋa, ku tapaveta kuku Maro Kindeni kawa ngua mao.

1 ¹Naŋa Saimon Petero, naŋa nde Yesu Kirisi ne wurâta tamâta, aku amo i ne pâri-tamâta tava. Yesu ina kinda nenda Maro Ŋalae wa nenda Yautâŋa Tamwata wa. Naŋa aŋgere ngua lâ pepa njine tini imâ pa miki kalo-tawana tamâta. Yesu Kirisi ne vetâŋa ara ikai nzâla piti pami lâ nana nemi kalo-tawana ipânŋa kelekele ara ndo, itogo maka nema kalo-tawana mine. ²Kala njine miki kasama Maro Kindeni ku nenda Maro Ŋalae Yesu rua kilalanzi marumbu lâ. Mine kala Maro Kindeni ne wisi-wisi wa wisi-pisi wa imâ ŋalae pami.

Maro Kindeni ipatea kinda pa i tamwata

³Kirisi nde ŋa ŋalae ndo, aku ina vetâŋa ara warika. Aku inani isarâwa pa kinda ku itula i tamwata kilala pwataki pa kinda tasama lâ. Mine kala io tamwata ne walo kaika imâ pa kinda, kala takura tu tamo sondo ku tapaveta kuku vetâŋa arara, aku kinda ma taroto nana sâ tonŋe kilo nana tapavila warakânda kê, ande ma tia. ⁴Ŋana i kilala ara njinde kê, ande iveta vetâŋa arara kie-kie pa kinda lâ, ikura muŋga ipa ngua tu ma iveta mine. Aku vetâŋa njinde uru isuka kinda, kala takura tu tanŋenge ŋana vetâŋa potomule ne pazavaruŋa kê, vetâŋani ndaina tamâta nenzi ilo-kalo sakamao iveta ipânŋa tâno kulu. Mine kala kinda takura tu tamo sondo ndo, itogo Maro Kindeni imo mine.

⁵Kirisi iveta vetâŋa ŋinde rârâni pa kinda lâ. Mine nde ara ŋana miki ma kakai wurâta kaika ndo ŋana kalomi tawana i mao nâ. Kaveta mine lâ ŋga, ŋineŋga kakai wurâta kaika ŋana kapaveta kuku vetâŋa arara. Kaveta mine lâ ŋga, ŋineŋga kakai wurâta kaika ŋana kapanâna sondo ŋana i ne ilo-kalo kâ. ⁶Kaveta mine lâ ŋga, ŋineŋga kakai wurâta kaika ŋana kakai poe sondo pa warakami ilomi kalomi. Kaveta mine lâ ŋga, ŋineŋga kakai wurâta kaika ŋana kamandi kaika lâ zo ndia malia ipâŋga pami. Kaveta mine lâ ŋga, ŋineŋga kakai wurâta kaika ŋana kamo itogo Maro Kindeni ilo papa mine. ⁷Kaveta mine lâ ŋga, ŋineŋga kakai wurâta kaika ŋana kaveta kemi ara nâ panzi nimi-nambwe kalo-tawana tamâta. Kaveta mine lâ ŋga, ŋineŋga kakai wurâta kaika ŋana kao ilomi ndo ilo panzi tamâta rârâni. ⁸Aporo ŋgua mine ŋana duvi ŋine kâ; ambo vetâŋa mine ma ikeno pami lee ipâŋga ŋalae tina, ande ŋinde ma isuka nemi wurâta kaveta pa nenda Maro ŋalae Yesu Kirisi kâ. Mine nde nemi wurâta ŋinde ma ipâŋga kanaŋo, aku miki ma kasama i kilala sondo tona. ⁹Ambo kalo-tawana tamâta tonŋe ma ipaveta kuku vetâŋa ŋinde tia, ande i imo itogo tamâta mata ŋaŋa mine. I ipâŋga tamâta mata leva-leva nâ, aku i kalo kapa tu Maro Kindeni muŋga izavaru kiesaka ne muso piti lâ i tini.

¹⁰Ŋingu-nambwe wukale, Maro Kindeni muŋgani isarawami lâ, aku ipateami pa i tamwata nâ. Mine nde ara ŋana miki ma kakai wurâta kaika ŋana kaponon muli pa i ne pateâŋa ŋinde. Ambo miki ma kaveta mine, ande nemi kalo-tawana ma ikura ŋana imbe kâ, ande tia. ¹¹Ŋineŋga Maro Kindeni ma ilo ndeka pami ku ma ikai nzâla piti pami ŋana kakai via mao lâ samba lawea. Aku miki ma kamo kuku nenda Maro ŋalae Yesu Kirisi, ina nenda Yautâŋa Tamwata, ma kamo ara mine ku kamo nâ.

¹²Mao nâ, miki kapanâna lâ ŋana kelekele ŋinde kâ, aku miki kapaipa lâ kuku ŋgua mao muŋga kaloŋo ŋinde. Andeta naŋa ma aporo ŋguani ndaina pami kilo ikura zo zo, ŋana miki ma kalomi ŋgere kilo ŋana ŋinde kâ. ¹³Naŋa ilonŋu patepa tu ambo naŋa ma akai wurâta mine ŋana apaŋo ilomi kalomi ikura zo rârâni naŋa amo viâŋgu lâ tâno kulu, ande ŋinde ma ara. ¹⁴Ŋana tu naŋa asama ŋine; zo mbwana-mbwana nâ, ŋineŋga naŋa ma apile karaŋgu ŋine ku amâte. Nenda Maro ŋalae Yesu Kirisi itula ŋine pwataki pa naŋa lâ. ¹⁵Mine kala ŋine naŋa ma aveta wurâta kaika ndo ŋana apaŋo ilomi kalomi kâ. Ŋineŋga lâ zo ŋana amâte kâ, ande miki ma kakura tu kalomi ŋgere kilo ŋana ŋgua ŋine kâ ikura zo zo.

**Kinzi pâri-tamâta simora Maro Kindeni ne
sinâla pwataki lâ Yesu Kirisi tini**

¹⁶Muŋga maka katula ŋgua pami ŋana Maro ŋalae Yesu Kirisi ne zo ŋana itaulo imâ kilo tava ne walo kaika. Andeta maka ŋandai katapâri

tamâta nenzi usi kaa nâ pinde pami nga. Maka warakama matama kamora i ne walo kaika ninde. ¹⁷Zo tonje, kawa ngua ne sarawâna iyoka pa Maro Kindeni ne sinâla njae ilo ku indue imâ pa Yesu Kirisi mine tu, “Naja natungu ara kala nîne. Naja tiningu mwasa papa wa ilongu ndeka papa wa.” Aku lâ zoni ndaina, kinda Tamânda Maro Kindeni isuka Yesu Kirisi nja kâki, aku Yesu tini pasinala. ¹⁸Maka warakama kalonjo ngua ninde ne sarawâna iyoka pa samba ilo indue imâ, lâ zo ninde maka kamo kuku Yesu lâ tuu sapâna ninde kulu.

¹⁹Mine nde maka kasama tu ngua-tulâna tamâta muŋgâna nenzi ngua ninde nde mao kanaŋo. Aku ara nana miki kala ma kalomi tawana ngua ninde mine nâ. Njua ninde nde itogo sinâla nana ipane kondoma pwataki kâ. Aku sinâla ninde ma isinala nia mine lee mbwale pwataki, njineŋga pitu mboi njae ma ipâŋga ku ma isinala ilomi kalomi.^a ²⁰Miki ma kapanâna sondo ndo nana ngua nîne kâ, nana tu nîne nde kekeleke njae tina; siŋgani, lâ zo ninde kinzi ngua-tulâna tamâta siporo ku siŋgere nenzi ngua lâ pepa tini, ande kinzi warakanzi sikura nana situla ngua ninde ne duvi pwataki, ande tia. ²¹Andeta Koroani Sapâna ikai poe pa kinzi ngua-tulâna tamâta ilonzi kalonzi, kala situla Maro Kindeni kawa ngua. Kinzi nandai sikai poe pa warakanzi ilonzi kalonzi njineŋga situla ngua nga. Tia ndo kanaŋo.

Kinzi tamâta sakamao pinde siyaulanzi kalotawana tamâta ilonzi kalonzi

2 ¹Mao nâ, muŋga ngua-tulâna tamâta laŋeŋa pinde simo lâ Isrel ngu nŋininzi. Aku mine nâ, pananâna tamâta laŋeŋa pinde ma simâ sipâŋga miki nŋinimi tona, aku ma sikai laŋeŋa nâ sipanananzi tamâta nana Maro Kindeni ne vetâna kâ. Kinzi ma sipavea nâ situla ngua laŋeŋa kaŋa-kaŋa nana sizavaru ilomi kalomi kâ. Maro Njae muŋga iyautenzi pananâna tamâta ninde piti lâ kondoma ilo, andeta kinzi sipu mulinzi pa Maro Njae kilo. Mine nde Maro Kindeni ma muli izavarunzi walele nâ. ²Andeta kalo-tawana tamâta râra ma sipaveta kuku pananâna tamâta laŋeŋa ninde nenzi vetâna potomule kie-kie. Mine kala tamâta pinde ma siporo ngua soki-soki nana Nzâla Mao kâ. ³Kinzi pananâna tamâta laŋeŋa ninde ilonzi yosi nana tâno ne kekeleke nâ. Mine kala kinzi ma siveta ngua laŋeŋa râra nana sikai nemi mbaliŋa wa kekeleke saŋemi. Andeta siŋgani Maro Kindeni ipatea tu ma izavarunzi tamâta ninde ndo. Aku i nandai ikeno mata nga. I ma iveta panzi ikura muŋga ipa ngua tu ma iveta mine.

⁴Miki kasama tu muŋga, kinzi aŋelo pinde siveta kiesaka, aku Maro Kindeni igera kinzi tia ndo. Itambiranzi silâ yâa njae ne mbâa ilo,

^a 1:19 Petero isia ngua nana Yesu Kirisi kâ lâ Pitu Mboi tini.

aku ipanzi lâ wâlo kaika tini. Kinzi uru simo mine lâ nia ŋaŋa ilo, aku sindaŋe Maro Kindeni ne zo ŋalae ŋana ipare nia sondo panzi kâ. ⁵Aku miki kasama tu nia ndoyo, tamâta rârâni simo siveta vetâŋa sakamao nâ lâ Maro Kindeni nao. Mine kala ipare nia panzi lâ. Iveta pondi ŋalae ipâŋga panzi ku izavarunzi ndo lâ, kala naonzi tia lâ. Aŋga timbunda Noa, i tamâta ŋana itula ŋgua pwataki ŋana vetâŋa ara kâ, ande Maro Kindeni ikea ŋana i tavanzi tamâta lima kanaŋonzi rua, kala kinzi ŋinde nâ simo ara. ⁶Aku miki kasama tu muli, Maro Kindeni ipa ŋgua ŋana izavaru Sodom lawea wa Gomora lawea wa. Isupwa yââ indue imâ ikananzi lawea rua ŋinde, kala kââ nâ ikeno. I ilo tu kinzi tamâta sipâŋga muli-muli ŋinde ma kalonzi ŋgere ŋana mâsi ŋalae ŋinde muŋga ipâŋga pa Sodom lawea ŋga Gomora lawea. Ambo kinzi kala ma sipu mulinzi pa i, ande mâsi kie mine ma ipâŋga pa kinzi tona. ⁷Aŋga Loto, i nde tamâta ara ndo lâ Maro Kindeni nao, ande i muŋga imo Sodom lawea. Imora vetâŋa potomule kie-kie kinzi tamâta sakamao ŋinde siveta, kala ilo malia ndo. Mine kala Maro Kindeni ikea ŋana Loto, kala imo ara nâ. ⁸Loto nde tamâta ara lâ Maro Kindeni nao, taitu i imo kunzi tamâta simo Sodom lawea, aku ikura zo zo imora nenzi mâsi sakamao wa iloŋo nenzi ŋgua soki-soki wa. Mine kala i ilo kura tia ndo, aku kalo loko nâ. ⁹Miki kasama lâ ŋana vetâŋa ŋinde rârâni. Aku ŋinde itula pwataki tu lâ zo ndia samâŋa wa malia mine ma ipâŋga panzi tamâta, ande Maro ŋalae uru ikea ŋananzi tamâta ea kalonzi tawana i. Aŋga kinzi kiesaka tamwatanzi, ande Maro ŋalae ikainzi kaika ku nâna ilanzi lee, ikura lâ zo ŋalae ŋinde i ma ipare nia sondo panzi. ¹⁰Aku lâ zo ŋinde, tamâta pinde ma sikai pareŋa-nia sakamao ŋalae tina. Naŋa aporo ŋananzi tamâta ŋinde sipono muli pa ilo-kalo siŋga ne mâsi sakamao, ku simora tukunja rârâni tu kelekele kaa nâ.

Ayo, pananâŋa tamâta laŋeŋa pinde nde simâ sipâŋga lâ, kala simo ŋginimi. Kinzi nde taŋa-kaika tamwatanzi, aku sipaveta kuku warakanzi nenzi pateâŋa nâ. Mine kala kinzi ŋandai simege ŋananzi aŋelo arara ŋinde simo samba ilo ŋga. Kinzi siporo ŋgua pavaligiŋa nâ panzi. ¹¹Taitu aŋelo ŋinde nenzi walo kaika nde ŋalae ndo, ipolenzi pananâŋa tamâta laŋeŋa ŋinde nenzi walo. Andeta kinzi aŋelo simege ŋana Maro ŋalae kâ. Mine kala kinzi ŋandai siporo soki ku sisowe ŋgua lâ tamâta ŋinde tininzi lâ Maro ŋalae nao ŋga. ¹²Aŋga pananâŋa tamâta laŋeŋa ŋinde nde sitogonzi ŋgoa ŋgoi, nenzi ilo-kalo tia ndo. Ambo ilonzi igagatinzi tu siveta vetâŋa tonje, ande ma siveta nâ. Vetâŋa ara ndia kinzi sizizâla ŋana, ande kinzi siporo ŋgua pavaligiŋa lâ ŋinde tini. Muli ŋga Maro Kindeni ma ikainzi tamâta ŋinde kaika ku ma izavarunzi ndo lâ, itogo uru taveta panzi ŋgoa ŋgoi mine.

¹³Kinzi uru nâna silanzi tamâta pinde. Mine nde muli Maro Kindeni ma itu ŋana nenzi vetâŋa ŋinde, aku ma nâna ilanzi. Kinzi sindeka

ņana sika wa sinu ŋalae tina lâ tamâta naonzi, aku mainzi tia ndo. Mao nâ, kinzi sindeka ŋana sika potomule mine nâ kuku miki. ¹⁴Ikura zo zo, ambo kinzi matanzi ilâ simora taine tonĝe, ande ilonzi ndo tu ma sipalulua tininzi kuku i. Kinzi uru ilonzi yosi mine ku simo nâ. Kinzi uru siporo silaņenzi tamâta pinde, kinzi ŋinde nenzi kalo-tawana ikeno kaika tia, aku silele tamâta ŋinde naonzi ilâ tu siveta kiesaka. Kinzi ilonzi ndo ŋana sikai tamâta pinde nenzi kelekele saņenzi kâ. Mine kala Maro Kindeni ma izavarunzi pananâņa tamâta laņeņa ŋinde ndo lâ.

¹⁵Kinzi sipile vetâņa ara ne nzâla marumbu lâ, kala soka potomule silâ wa simâ wa. Kinzi sipono muli pa Beor natu Balam ne vetâņa. Muņga, Balam iveta kiesaka, aku ilo yosi ŋana mbumbu ikai lâ kiesaka ŋinde tini. ¹⁶Iveta mine lee, ŋineņa zo tonĝe “donki” tonĝe kawa ipwa, kala iporo ŋgua itogo tamâta mine. Donki ŋinde imbita Balam ŋana i ne vetâņa sakamao ŋinde kâ. Kinda tasama tu kinzi donki sikura tu siporo ŋgua, ande tia. Mine kala ŋgua-tulâņa tamâta laņeņa Balam imora mâsi ŋalae ŋinde, aku ipile ne vetâņa kapa-kapa ŋinde.

¹⁷Kinzi pananâņa tamâta laņeņa ŋinde nde sitogo lââ bwalika ipâņa mâsa-mâsa ndo mwasina. Aku sitogo take-take karâzi ikeno ilo, andeta lawea itapala ilâ kala karâzi imbe tia.^b Maro Kindeni ipatea nia kondoma ŋaņa ndo pa kinzi tu ma silâ simo nia ŋinde. ¹⁸Ŋana tu tamâta ŋinde kawanzi ŋalae sisuka warakanzi ŋanzi kâki, aku sindeka nâ ŋana nenzi ŋgua kaa kaa ŋinde. Kinzi siporo ŋgua mâru-mâru silaņenzi tamâta pinde, kala ilonzi kâki ŋana sipalulua tininzi potomule kâ. Kinzi sitapanzi kalo-tawana tamâta wasaseki pinde, kinzi ŋinde muņga nâ sipile tinikoa nenzi mâsi sakamao. Kinzi ilonzi tu kalo-tawana tamâta wasaseki ŋinde nenzi kalo-tawana ma imbe ndo.

¹⁹Pananâņa tamâta laņeņa ŋinde uru siporo mine tu, “Ambo miki ma kapaloņo pa maka, ande miki ma kamo tinimi soo nâ, aku ma kakura tu kaveta vetâņa ndia warakami nâ ilomi papa.” Andeta kiesaka ne nimbu nde ikainzi kaika lâ, kala simo sakamao nâ. Ŋinde nde duvi mine; ambo tamâta tonĝe isâu pa kelekele tonĝe tu ikai poe kaika papa i, ande ŋinde itogo iveta wurâta koa tia nâ pa kelekele ŋinde. ²⁰Pananâņa tamâta laņeņa ŋinde muņga kalonzi tawana nenda Maro Ŋalae Yesu Kirisi, ina nenda Yautâņa Tamwata, aku nenzi kalo-tawana ŋinde ivilanzi tu siņgeņge ŋana tâno ne vetâņa sakamao kâ. Andeta muli ŋga sipaveta kuku vetâņa sakamao ŋinde kilo, kala vetâņa sakamao ŋinde ne nimbu nde ikainzi kaika ku ipu nenzi walo ndue lâ. Muņga, lâ zo ŋinde kinzi sizizâla yo ŋana Kirisi kâ, ande kinzi simo ara tia. Taitu vetâņa sakamao ŋinde ne nimbu nde ipanzi kaika kilo, kala simo sakamao ndo. ²¹Ambo

^b 2:17 Ŋgua siâņa ŋine nde duvi mine; pananâņa tamâta ŋinde siporo tu ma sivilanzi tamâta, andeta ŋandai sivilanzi ŋga.

pananânja tamâta lajeja njinde sizizâla yo njana nzâla ara kâ, ande njinde ma ara tia. Taitu kalojo nga; kinzi silojo pâri ara ku sisama nzâla njinde kilala pwataki lâ, aku sipono muli pa Maro Kindeni ne tukuja. Andeta muli, kinzi sipu mulinzi pa nzâla njinde kilo, aku njinde nde ara tia ndo.

²²Kinzi nenzi vetâja mine nde iyoke ngua pinde tamâta uru siporo. Ngua tonje nde keno mine; “Ambo mbwâmbwa ilua, ande i ma itaulo ika ne luâja njinde kilo.” Anja ngua tonje kala ikeno mine; “Ambo ngoa ilili lâ lââ ilo, ande i ma itaulo kilo ku ipu ndumu lâ nzija ilo.”

Ngua njine nde mao kanao; Maro Njalae ma itaulo imâ kilo

3 ¹Ningu-nambwe wukale, naja munga angere ngua lâ pepa tonje tini ku ao imâ pami, kala njine angere ngua pinde lâ pepa tini kilo imâ pami. Lâ pepa rua njine, ande naja angere ngua njana apaño ilomi kalomi kâ, njana miki ma kalomi ngere kilo njana ngua mao wa ilo-kalo ara wa. ²Naja ilongu tu miki ma kalomi ngere kilo njana ngua njinde Maro Kindeni ne nguatulâja tamâta munga situla. Aku naja ilongu tu miki ma kalomi ngere kilo njana Maro Njalae ne tukuja tona, ina nenda Yautâja Tamwata. Munga kinzi pâri-tamâta simâ pami ku situla ngua tukuja ndainani nâ pami kalojo lâ.

³Naja ilongu tu miki ma kalojo ngua njine sonde; muli nga, ande tamâta pinde ma simâ sipânga. Kinzi tamâta njinde ma sipaveta kuku vetâja sakamao ndia ilonzi papa njinde. Kinzi ma siporo ngua pavaligija pami mine tu, ⁴“Yesu munga iporo tu i ma itaulo imâ kilo, a? Ande imo ndia, a? Yoo, i ma itaulo imâ kilo tia! Nia ndoyo, lâ zo njinde tâno ipânga wasaseki, aku imâ lee ikura lâ zo njinde timbunda simâte lâ, aku lâ zo njine wa, ande vetâja wasaseki tonje kie mine ipânga tia ndo.” ⁵Tamâta njinde tininzi pwâka tu kalonzi ngere sonde. Mine kala kinzi kalonzi kapa njana njine kâ; nia ndoyo, Maro Kindeni iporo ngua kala ipulianzi samba tava tâno sipânga lâ. Ikai lââ ku iveta tâno, njineja io tâno kâki ipânga lâ lââ ngini. ⁶Aku muli, njineja Maro Kindeni ikai lââ ndainani nâ ku iveta pondi njalae ikâki ipanando tâno ku iyaula tâno ndo lâ. ⁷Kala lâ zo njine, ande Maro Kindeni kawa ngua ndainani nâ uru ikatona samba wa tâno wa. I ma iveta mine lee, ikura lâ zo njalae njana i ma ipare nia panzi tamâta ea sipu mulinzi pa i, aku ma izavarunzi ndo lâ. Aku lâ zoni ndaina i ma isupwa yââ ikananzi samba wa tâno wa, kala naonzi tia lâ.

⁸Ningu-nambwe wukale, lâ Maro Njalae nao, ande kari taitu mai nâ nde zo luandondo, itogo mbwera 1,000 mine, anja mbwera 1,000 nde zo mbwana-mbwana nâ, itogo kari taitu mai nâ mine. Miki ma kalomi ngere sonde njana njinde kâ, aku kalomi kapa ndimo. ⁹Njana tu tamâta pinde ilonzi pateja tu Maro Njalae uru iveta ne ngua pâja ipânga kanao walele tia, aku situ njinde nde soki. Andeta tia. I tini pwâka tu tamâta taitu ma ipayaula. I ilo tu kinzi tamâta rârâni taitu-taitu ma sipalele ilonzi kalonzi ku kalonzi tawana i. Mine kala i kalo sukâja njananzi ku imo io tini nâ.

Samba wa tâno ma naonzi tia lâ

¹⁰Taitu Maro Ŋalae ne zo ŋana itaulo imâ kilo kê, ande ma imâ ipânga itogo nanzare tamâta uru imâ ipânga mine. Lâ zo ŋinde, ande nduŋeŋa ŋalae tina ma ipânga, aku samba ma nao tia lâ. Aku yââ ma ikananzi pitu rârâni marumbu lâ. Aŋga tâno tava kelekele ndoni ikeno tâno kulu, ande ŋinde ma marumbu ndo.

¹¹Miki kalomi ŋgere sondo ŋga! Vetâŋa mine ma izavaru kelekele rârâni ŋinde, kala ma naonzi tia lâ. Mine kala lâ zo ŋine, ande miki ma kamo tamâta mana, a? Ara ŋana miki ma kapasakana ilomi kalomi sondo ku kapaveta kuku vetâŋa rârâni Maro Kindeni ipatea ku itula pami ŋinde. ¹²Ara ŋana miki ma kao tinimi nâ ŋana Maro Kindeni ne zo ŋana imâ ipare nia panzi tamâta kê. Aku ara ŋana miki ma kapasusua zo ŋinde tu imâ ipânga walele nâ. Lâ zo ŋalae ŋinde, ande yââ ma ikana samba marumbu lâ, aku yââ ne mela-mela kaika ma ikananzi pitu rârâni tona. Mine kala pitu ŋinde ma sipânga sitogo lââ mine. ¹³Andeta Maro Kindeni ne ŋgua pâŋa ikeno mine tu i ma muli ipulia samba wa tâno wasaseki. Aku lâ tâno wasaseki ŋinde, ande tamâta rârâni ma sipono muli mao nâ papa i. Kinda uru tao tininda nâ ŋana Maro Kindeni ne ŋgua pâŋa ŋinde tu ma ipânga kanaŋo.

Ara ŋana kinda ma tapakatona sondo ku tao tininda ŋana Maro Ŋalae kê

¹⁴Niŋgu-nambwe wukale, miki uru kao tinimi nâ ŋana Maro Kindeni ne zo ŋalae ŋinde ŋana imâ ipânga kê. Mine nde ara ŋana miki ma kakai wurâta kaika ŋana kapakatona warakami nemi ilo-kalo sondo kê. Ambo miki ma kaveta mine, ŋineŋga lâ zo ŋalae ŋinde, ande miki ma kamandi lâ Maro Kindeni nao tava ilomi mbâra-mbâra nâ. I ma imora soki wa kiesaka tonŋe ikeno tinimi, ande tia. Mine kala i ne wisi-nâna ma ikeno pami tia ndo. ¹⁵Miki kalomi ŋgere ŋana ŋine kê; Maro Ŋalae uru io tini pa kinda tu tapalele ilonda kalonda, ŋana tu i ilo tu iyaute kinda rârâni piti lâ kondoma ilo. Muŋga, Maro Kindeni itula ilo-kalo ara pa ninda-nambwe Paulo, kala iŋgere ŋgua kaŋa taituni nâ imâ pami lâ. ¹⁶Lâ i ne pepa rârâni, ande Paulo uru iŋgere ŋgua kaŋa taituni mine ŋana zo ŋalae ŋinde kê. Mao nâ, zo pinde Paulo ne ŋgua katiŋe ne duvi ŋandai ikeno nia yo ŋga, kala taroto ŋana ŋgua ŋinde ne duvi. Mine kala tamâta pinde uru situla ŋgua ŋinde ne duvi soki-soki. Kinzi tininzi pwâka tu sisama ŋgua ŋinde duvi, aku nenzi kalo-tawana nde kaika tia. Kinzi sikai Maro Kindeni kawa ŋgua rârâ ikeno lâ pepa tini, aku silele soki-soki mine nâ. Mine nde lâ Maro Kindeni ne zo ŋalae ŋinde, ande i ma izavarunzi tamâta ŋinde ndo lâ.

¹⁷Niŋgu-nambwe wukale, miki kasama lâ ŋana pananâŋa tamâta laŋeŋa ŋinde nenzi vetâŋa. Mine nde kapakatona warakami sondo

nga. Tia ma pananânga tamâta sakamao ŋinde silaŋemi ku sisowe ilomi kalomi, kala nemi kalo-tawana ma imbe tâ. ¹⁸Kinda nenda Maro ŋalae Yesu Kirisi, ina nenda Yautânga Tamwata, ande uru io ne wisi-wisi imâ pami, aku miki kasama i kilala marumbu lâ. Ara ŋana miki ma kakai wurâta kaika ŋana kapanâna sondo ndo ŋana ŋinde kê. Tapanea Yesu Kirisi tasuka i ŋa kêki ikura zo zo! Mao.